

KARTA KU PAULU SKIRBI PA GÁLATAS

Introduson

Galásia seduba un pruvinsia di Asia Menor, suma ki pudi ojadu na mapa. No ka sibi sertu kal prasas ku staba dentru di si limitis. Paulu funda igrežas la na si purmeru bias misionariu (At 13—14), i torna visita elis na si sugundu ku terseru bias (At 16.6; 18.23).

Utru jinti, talves judeus, kumsaba na nsina kuma jintius ten ku sirkunsidadu, e guarda tudu lei di Moisés, pa e pudi tene salbason. Krentis di Galásia staba pruntu pa seta ki nsinamentu. Paulu skirbi e karta pa ribanta elis pa se purmeru fe. I Jesus Kristu propi ku nsina Paulu aserka di Bon Noba (1.11-12). Asin i diklara kuma salbason i son pa fe na Siñor Jesus. Jintius pudi sedu fijus di Abraon si e pertensi Kristu (3.29). Guarda lei ka ta salba ningin. Si Spiritu di Deus sta na nos, no dibi di mostra frutu di Spiritu (5.22-23).

Kumsada ku manteña

1 ¹E karta i di mi, Paulu, apostolu. I ka omi ku coman pa N sedu apostolu, nin e comada ka bin pabia di omi, ma i Jesus Kristu ku coman, ku Deus Pape ku lantandal di mortu. ²Ami ku tudu ermons ku sta ku mi no na skirbi pa igrežas di Galásia. ³N misti pa Deus no Pape ku no Siñor Jesus Kristu da bos fabur ku pas. ⁴Pa libertanu de tempu mau ku no sta nel, Kristu da si vida pa no pekadu, suma ku Deus no Pape mistiba, ⁵kil ku dibi di dadu gloria pa sempri. Amen.

Bon Noba i un son

⁶N fika dimiradu suma ku bo les-tu di da kosta pa kil ku coma bos na fabur di Kristu, pa bo bai pa utru

bon noba. ⁷Na bardadi i ka ten utru bon noba, ma i ten jinti ku na kun-fundi bos; e misti tursi Bon Noba di Kristu, ⁸ma nin ki anos propi, o anju di seu, ku torna konta bos bon noba ku kauntu ku kil ku no kon-taba ja bos, i ta sedu maldisuadu. ⁹Suma ku no fala ja, N na torna ripitil: Si algin konta utru bon noba ku kauntu ku kil ku bo seta ja, i ta sedu maldisuadu.

¹⁰N na papia pa ngaña fabur di omi o di Deus? O N na buska pui omi kontenti? Si N na buskaba inda pui omi kontenti, N ka ta sedu servu di Kristu.

Manera ku Paulu bin sedu apostolu

¹¹Pera N konta bos un kusa, ermons. Bon Noba ku N na konta i ka di omi, ¹²pabia N ka risibil di nin un omi, nin i ka omi ku nsinan el. I Jesus Kristu propi ku mostran el.

1.1: At 22.15,21; Rom 1.1 1.2: 1 Kor 16.1
1.4: Mat 20.28 1.7: At 15.1,24; 2 Kor 11.4
1.8: 1 Kor 16.22 1.9: Lei 4.2 1.10: 1 Tes 2.4; Tia 4.4
1.12: 1 Kor 15.1-3; Ef 3.3

¹³Bo obi ja kuma ku ña vida seduba oca N staba na riližion di judeu, manera ku N ta pirsigiba ku forsa igreža di Deus, N buska kaba ku el. ¹⁴Na ña rasa N mas ba manga di ña manjuas na sigi riližion di judeu. N forti ba dimas na fasi usu di ña papes antigu.

¹⁵Deus kujin antis di N padidu, i coman pa si fabur. ¹⁶Oca ku Deus mostran si Fiju, konformi si vontadi, pa N pudi konta aserka del na metadi di kilis ki ka judeus, N ka pidi konsiju na nin un algin, ¹⁷nin N ka bai Jerusalem pa oja ku ki utrus ku seduba ja apostolus antis di mi, ma N bai Arabia; dipus N riba utrubias pa Damasku. ¹⁸Tris anu pasa; N bin bai pa Jerusalem pa bai visita Pedru, N tarda la kinzi dia ku el, ¹⁹ma N ka oja nin utru apostolu, fora di Tiagu, ermon di Siñor.

²⁰Ke ku N skirbi i bardadi. Dianti di Deus N ka na konta mintida.

²¹Dipus N bai pa parti di Siria ku Silísia. ²²Krentis di igrežas di Kristu na Judeia e ka kunsiba ña rostu. ²³E obi son ña noba, kuma kil ku ta pirsigi elis, gosi i na konta aserka di ki fe ki mistiba kaba ku el. ²⁴Asin e na da Deus gloria pabia di mi.

Paulu ku utru apostolus

2¹Oca ki pasa katorzi anu, N bai utru bias pa Jerusalem, ku Barnabé. N leba tambi Titu ku mi. ²N bai, pabia Deus mostran kuma N dibi di bai. Na un runion aparti ku garandis di igreža, N konta se dianti Bon Noba ku N ta konta pa kilis ku ka sedu judeus. N ka mistiba

pa tarbaju ku N fasi, ku N na fasi-ba inda, sedu na nada. ³Nin Titu, ña kumpañer, ku sedu gregu, i ka obrigadu pa i sirkunsidadu, ⁴kontudu utrus mistiba pa i sedu. E finji sedu ermons, e yentra sukundidu suma spion pa pudi jubi liberdadi ku no ten na no ligason ku Kristu Jesus. E misti mitinuba na kanse-ra di lei, ⁵ma no ka seta se ordi nin pa un ora, pa bardadi di Bon Noba pudi fika firmi na bo metadi.

⁶Kilis ku parsiba kuma e sedu garandis di igreža (ma se garandesa i ka nada pa mi; Deus ka ta jubi parsensa di jinti); N fala: esis ku parsiba sedu garandis, e ka dan nobu ideia, ⁷ma e oja kuma Deus dan tarbaju di konta Bon Noba pa kilis ku ka sedu judeus, suma ki da Pedru pa judeus. ⁸Deus ku tarbaja ku puder dentru di Pedru pa fasil apostolu pa judeus, el tambi ku tarbaja ku puder na mi pa fasin apostolu di kilis ki ka judeus. ⁹Oca ku Pedru, Tiagu ku Jon, ku parsiba sedu firkijas, e rapara kuma i Deus ku danba e tarbaju, e danu mon, ami ku Barnabé, suma se kumpañeris di tarbaju. No konkorda kuma anos no ta bai pa kilis ki ka judeus; elis e ta bai pa judeus. ¹⁰E rekumendanu son pa no ba ta lembra di koitadis di igreža di judeus. I un kusa ku N buska fasi ku mpeñu.

1.13: At 8.3 **1.14:** Fil 3.6 **1.15:** Is 49.1,5; At 9.15; 13.2
1.16: At 22.21 **1.19:** Mat 13.55 **1.20:** Rom 9.1
2.1: At 15.2 **2.2:** Kap 4.11; Fil 2.16; 1 Tes 3.5 **2.4:** At 15.1
2.6: At 10.34 **2.7:** At 9.15 **2.9:** Ef 2.20; Apok 21.14
2.10: At 11.29-30 **2.11:** At 15.35

Paulu raprindi Pedru na Antiokia

¹¹Oca ku Pedru ciga na Antiokia, N papia kontra el si dianti, pabia i tenba kulpa. ¹²Antis di ciga kilis ku Tiagu manda, i ta kumeba ku kilis ki ka judeus, ma oca ke ciga, i fika i na kuri, i ka kume mas ku elis, pabia i medi kilis ku na nsina kuma tudu krenti dibi di sirkunsidadu. ¹³Ki utru krentis judeu tamba finji suma Pedru, na manera ku te Barnabé lebadu na ki finjimentu. ¹⁴Oca ku N oja kuma e ka na yanda diritu suma bardadi di Bon Noba, N fala Pedru dianti delis tudu: “Si abo ku sedu judeu bu ka na yanda suma judeu, ma bu na yanda suma jintiu, kuma ku bu pudi obriga jintius pa e vivi suma judeus?”

Salbason di judeu ku jintiu i son pa fe

¹⁵Anos i judeu di nasimentu; no ka sedu jinti di utru rasa ku fasi pekadu, ¹⁶ma suma no sibi kuma omi i ka fasidu justu pabia i fasi kil ku lei fala, ma pa fe na Jesus Kristu, anos tamba no seta Jesus Kristu pa no pudi fasidu justu pa fe nel; i ka pabia no fasi kil ku lei fala. Ningin ka pudi fasidu justu pabia i fasi kil ku lei fala.

¹⁷Si anos, ku na buska fasidu justu na no ligason ku Kristu, no na ojadu ku pekadu suma kilis ki ka judeus, N punta: I pabia Kristu na sirbi pekadu? Di nin un manera!

2.12: At 10.28; 11.2 **2.16:** At 13.38-39; Rom 1.17; 8.3
2.17: 1 Jon 3.8-9 **2.19:** Rom 7.4-6; 8.2; Eb 9.14
2.20: Rom 6.6; 2 Kor 5.15 **2.21:** Kap 3.21; Rom 11.6
3.1: Kap 5.7 **3.2:** At 2.38; Ef 1.13 **3.6:** Kum 15.6
3.7: Rom 4.11-12,16 **3.8:** Kum 12.3

¹⁸Si N torna kumpu kualker kusa di lei ku N danaba ja, N ta ojadu, ami propi, suma kil ku ta kebra lei. ¹⁹Na ladu di lei N sta mortu; i lei propi ku matan, pa N pudi vivi pa Deus. ²⁰N sta ja krusifikadu ku Kristu. N na vivi; i ka ami ku na vivi, ma Kristu na vivi na mi. Vida ku gosi N na vivi na kurpu, N na vivil na fe ku N ten na Fiju di Deus, kil ku aman, i ntrega si vida pa mi. ²¹N ka na nega fabur di Deus. Si algin ta fasidu justu pabia di sigi lei, nta mortu di Kristu ka sedu nada.

Lei o fe?

3 ¹Abos tulus di Galásia! Kin ku mbarianta bos? Mortu di Jesus Kristu na krus staba klaru na bo uju. ²Son es ku N misti sibi di bos: Bo risibi Spiritu di Deus pabia di fasi kil ku lei fala, o pabia bo fia na Bon Noba ku bo obi? ³Kuma ku bo sedu tulu asin? Bo kumsa na Spiritu di Deus, bo misti kabanta na bo forsa! ⁴Nta tudu ku bo pasa i ka sedu nada? Sertamenti i sedu un kusa. ⁵Deus ta da bos Spiritu, i ta fasi milagris na bo metadi. I ta fasil pabia bo fasi kil ku lei fala, o pabia bo fia na Bon Noba ku bo obi?

⁶Bo jubi pa Abraon. El i fia na Deus; si fiansa pui Deus ojal justu. ⁷Bo dibi di ntindi kuma, jinti ku ten fe, elis ku sedu fijus di Abraon. ⁸Skritura jumna mostra kuma, Deus ta fasi jintius justu si dianti pabia di se fe, suma ku Deus konta Abraon Bon Noba kuma, tudu nasons ten ku sedu bensusadu pabia del. ⁹Abraon fia; Deus bensusual.

Tudu kil ku fia tambi, Deus ta bensual juntu ku Abraon.

¹⁰Kilis ku pui se fiansa na obdisi lei e sta bas di maldison, pabia Skritura fala kuma: “Tudu kil ku ka ta kontinua fasi tudu kusa ku sta skritu na libru di lei i maldisuadu.” ¹¹I klaru kuma ningin ka na ojadu justu dianti di Deus pabia i kumpri lei, ma i sta skritu kuma, kil ku sedu justu, i na vivi pabia di si fe. ¹²Lei ka ten nada ku fe, ma i sta skritu kuma, kil ku ta fasi kusas ku lei fala, el i na yangasa vida.

¹³Suma ku Kristu bida maldison pa nos, i kaplintinu di maldison ku lei tisi, pabia i sta skritu kuma, tudu kil ku pindrada na krus di madera i maldisuadu. ¹⁴Kristu fasi asin pa benson ku Deus fala i na da Abraon pudi dadu pa jintius pabia di Jesus Kristu, pa anos, suma no fia, no pudi risibi Spiritu ku Deus fala i na da.

Lei ku purmesa

¹⁵Ermons, N misti da bos un isemplu di kusa ku bo na ntindi. Si un omi fasi testamentu, i sina si nomi nel, ningin ka pudi pajigal nin buri utru kusa la. ¹⁶Agora, Deus da si purmesa pa Abraon ku si fiju. ^a Skritura ka fala “fijus” ku sedu manga delis, ma i fala “pa bu fiju” ku sedu un son, ki Kristu. ¹⁷Ke ku N misti fala, kuma Deus fasi kontratu ku Abraon, i da sertesa na si palabra kuma i na fasil. Lei, ku bin bin kuatrusentus i trinta anu dipus, i ka pudi dana ki kontratu, nin pa mainanta purmesa. ¹⁸Si kil ku Deus na da i sedu pabia di lei, nta i

ka pabia di purmesa, ma na barda di Deus pati Abraon ki kusa pabia i purmiti.

¹⁹Nta lei i pa ke? I buridu pa mostra ke ki mau. I sedu pa te ora ku ki fiju bin, ku purmesa dadu pa el. Anjus ntrega lei na mon di un midianeru, ku sedu un omi ku staba na metadi di Deus ku pobu. ²⁰Midianeru i ka pirsis si i ten un algin son, ma Deus i un son.

²¹Nta lei na fala kontra purmesas di Deus? Nau. Si i daduba un lei ku pudiba da vida, nta algin pudi ojaduba justu pabia di ki lei, ²²ma Skritura fala kuma, tudu jinti sta bas di puder di pekadu, pa Deus pudi da krentis ki kusa ki fala i na da kilis ku fia na Jesus Kristu.

²³Antis di fe ciga, lei guardanu tudu ficadu bas del, nkuantu no na peraba fe pa i bin. ²⁴Asin lei seduba mestre ku ten konta di nos tok Kristu bin, pa dipus ki bin, Deus pudi ojanu justu pabia di fe nel. ²⁵Suma ku fe bin ja, no ka sta mas bas di mestre.

²⁶Pabia di fe na Kristu Jesus, abos tudu bo sedu fijus di Deus. ²⁷Bo batisadu tudu na unidadi ku Kristu; bo bisti si vida suma ropa. ²⁸Asin i ka ten judeu ku gregu, i ka ten katiibu ku libri, i ka ten macu ku femia,

3.10: Lei 27.26 **3.11:** Ab 2.4 **3.12:** Rom 4.4-5
3.12: Sir 18.5 **3.13:** Lei 21.23; 2 Kor 5.21 **3.14:** Is 44.3;
 Rom 4.16 **3.15:** Eb 9.17 **3.16:** Kum 21.12; 22.18
^a**3.16** *Fiju* o simentera (suma tambi na versikulu 19)
3.17: Sai 12.40-41; Rom 4.13-14 **3.19:** Jon 15.22;
 Rom 4.15; 1 Tim 1.9 **3.19:** Sai 20.19; Lei 5.5; Eb 2.2
3.20: Jo 9.33; 1 Tim 2.5 **3.22:** Sal 143.2; Rom 3.9;
 4.16 **3.24:** Mat 5.17; At 13.39; Rom 10.4; Kol 2.17
3.26: Jon 1.12 **3.27:** Rom 6.3 **3.27:** Rom 13.14
3.28: Rom 10.12 **3.28:** Jon 10.16; 17.21

pabia abos tudu bo sedu un son na Kristu Jesus. ²⁹Si bo pertensi Kristu, bo sedu jorson di Abraon, bo na risibi kil ku Deus fala i na da.

No ka sedu mas katibus, ma fijus

4 ¹Pa no kontinua, fiju ku na risibi yardansa di si pape, nkuantu i nobu i ta tratadu suma katibu, nin ku tudu i di sil. ²I ta sta bas di mestres ku prokuraduris te tempu ku si pape markaba. ³Asin tamba anos, antis di no maduru, no seduba katibu di manga di lei di mundu. ⁴Oca tempu propi ciga, Deus manda si Fiju, ku padidu di minjer, i kria bas di lei, ⁵pa i pudi liberta kilis ku sta-ba bas di lei, pa no pudi bin sedu fijus di Deus.

⁶Suma ku bo sedu si fijus, Deus manda Spiritu di si Fiju dentru di no korson, ku ta coma: “Deus no Pape.” ⁷Asin bu ka sedu mas katibu, ma bu sedu fiju. Si abo i fiju, Deus na dau tudu ki tene pa si fijus.

Kudadi di Paulu pa jinti di Galásia

⁸Purmeru, oca bo ka kunsiba Deus, bo seduba katibu di spiritus ku ka sedu deusis. ⁹Gosi ku bo kunsu Deus, o N dibi di fala, ku Deus kunsu bos, kuma ku bo pudi riba mas pa ki leis fraku i pobri? Pabia di ke ku bo misti sedu se katibu

3.29: Rom 8.17 **4.3:** Kol 2.8,20; Eb 9.10 **4.4:** Kum 49.10; Dan 9.24; Mar 1.15; Ef 1.10 **4.4:** Kum 3.15; Luk 2.7; Jon 1.14; Eb 2.14 **4.4:** Mat 5.17; Luk 2.46-47
4.5: Mat 20.28; Jon 1.12 **4.6:** Rom 5.5; 8.15-17; 1 Jon 5.10 **4.8:** 1 Tes 4.5 **4.9:** 1 Kor 8.3; Kol 2.20; 2 Tim 2.19; Eb 7.18 **4.10:** Rom 14.5; Kol 2.16
4.11: Kap 2.2 **4.13:** 1 Kor 2.3 **4.14:** 2 Sam 19.27; Mat 10.40 **4.19:** 1 Kor 4.15 **4.22:** Kum 16.15; 21.2
4.23: Kum 18.10,14; Eb 11.11

utru bias? ¹⁰Bo ta guarda dias, misis, tempus ku anus. ¹¹N medi pa bos, pa ña tarbaju pa bos ka bin sedu suma mon di sal na yagu.

¹²Ermons, N na pidi bos pa bo sedu suma mi, pabia ami N sedu suma bos. Nin un mal bo ka fasin. ¹³Bo sibi kuma i duensa na ña kurpu ku pun pa N bai konta bos Bon Noba purmeru bias, ¹⁴ma mesmu ku stadu di ña kurpu seduba un proba pa bos, bo ka njutin, nin bo ka negan, ma bo risibin suma anju di Deus, o suma Kristu Jesus propi. ¹⁵Kontentamentu ku bo tenba, nunde ki bai? N pudi da tustumuñu kuma, si bo pudiba, bo ta rinka bo ujus, bo danba. ¹⁶Nta gosi N sedu bo inimigu suma ku N konta bos bardadi?

¹⁷Ki utru jinti e ten garandi interes na bos, ma se sintidu i ka bon. E misti separa bos di utru jinti, pa bo pudi ten interes nelis. ¹⁸I bon pa ten interes, si i pa bon sintidu. I bon sempri; i ka pa son ora ku N sta ku bos. ¹⁹Ña fijus ku N ama, kilis ku N torna na sinti dur di partu pa el, tok Kristu sedu formadu na bos, ²⁰N misti sta juntu ku bos gosi pa N rabida ña fála, pabia N sta fadigadu pabia di bos.

Sara ku Agar

²¹Pera N punta bos utrus ku misti sta bas di lei: Bo ka obi ke ku lei fala? ²²I sta skritu kuma Abraon teneba dus fiju, un di katibu, utru di si minjer libri. ²³Fiju di katibu i padidu suma tudu mininu, ma kil ki di libri i padidu suma ku Deus

falaba. ²⁴E kusa i pudi ntindidu suma figura. E dus minjer i dus kontratu. Kil ku padi fiju pa kati-berasku i kontratu ku bin di Monti Sinai. Es i parsi Agar. ²⁵Sinai i un monti na Arabia ku parsintidu ku Jerusalem di gosi, pabia el ku si jinti e sta na katiberasku, ²⁶ma Jerusalem di seu i libri; el ki no mame. ²⁷I sta skritu:

“Abo, minjer sebadu, ku nunka ka padi, fika kontenti! Abo ku nunka ka sinti dur di partu, grita ku forsa, ku alegria! Pabia minjer ku bandonadu i na tene mas fijus di ki kil ku tene maridu.”

²⁸Anos, ermons, no sedu fijus suma Isak, konformi Deus falaba. ²⁹Suma na ki tempu kil ku padidu suma tudu mininu i pirsigi kil ku padidu pabia di Spiritu di Deus, asin tambi gosi i ta kontisi. ³⁰Ma ke ku Skritura fala? I fala kuma, pa serka katibu ku si fiju, pabia fiju di katibu ka na ten parti na yardansa juntu ku fiju di libri. ³¹Asin, ña ermons, no ka sedu fijus di katibu, ma di minjer libri.

Guarda bo liberdadi

5 ¹Kristu libertanu pa no sedu libri. Bo fika firmi. Ka bo seta torna maradu mas na korenti di katiberasku.

²Bo sukuta ke ku N na fala. Ami Paulu, N na fala bos kuma, si bo seta sedu sirkunsidadu, Kristu ka ta ten nin balur pa bos. ³Mas un bias

N na avisa bos kuma, kualker omi ku seta pa i sirkunsidadu, i obligadu guarda tambi tudu lei. ⁴Abos tambi ku na sigi lei pa pudi ojadu justu, bo ligason ku Kristu sta kortadu; bo kai di fabur di Deus. ⁵Suma nos, no speransa ku no na pera i pa no ojadu justu pa tarbaju di Spiritu di Deus pabia di no fe. ⁶Si no sta unidu ku Kristu Jesus, nin sirkunsison nin falta del ka ta fasi diferensa. Kusa mas importanti i fe ku ta tarbaja ku amor.

⁷Bo na kuriba diritu. Kin ku bin tuji bos sigi bardadi? ⁸E ngodu i ka bin di Deus ku coma bos. ⁹Un bokadu di fermentu i ta orfa tudu masa. ¹⁰No unidadi na Siñor i dan fiansa kuma bo ka na kuda di utru manera, ma ki algin ku na disinketa bos, kualker algin ki sedu, Deus na kastigal.

¹¹Ami, ermons, si inda N na fala pa jinti sedu sirkunsidadu, pa ke ku N pirsigidu? Ne manera N ka na fala di krus pa ka N ofindi ningin. ¹²Ma ki disinketaduris, i mas minjor e bai kabanta kapa se kurpu!

¹³Abos, ermons, bo comadu pa liberdadi; ma ka bo usa liberdadi suma diskulpa pa disa vontadi di bo kurpu manda na bos, ma bo sirbi ñutru ku amor. ¹⁴Tudu lei sta juntune un palabra: “Ama bu kumpañer

4.24: Sai 19.18-20; Lei 33.2 **4.26:** Eb 12.22; Apok 3.12; 21.2 **4.27:** Is 54.1 **4.28:** At 3.25; Rom 9.7-8

4.29: Kum 21.9 **4.30:** Kum 21.10,12; Jon 8.35

5.1: Jon 8.32; At 15.10; Rom 6.18 **5.2:** At 15.1

5.3: Kap 3.10 **5.4:** Kap 2.21; Rom 9.31-32; Eb 12.15

5.6: 1 Kor 7.19 **5.6:** 1 Tes 1.3 **5.7:** Kap 3.1

5.8: Kap 1.6 **5.9:** 1 Kor 5.6 **5.11:** 1 Kor 1.23

5.12: At 15.24 **5.13:** 1 Kor 8.9; 1 Ped 2.16; 2 Ped 2.19

5.14: Rom 13.8-9

suma bo propi.” ¹⁵Ma si bo na murdi, bo molosta n̄utru, bo toma sintidu pa ka bo kaba ku n̄utru.

Frutu di Spiritu di Deus ku naturesa di omi

¹⁶N misti fala bos pa bo yanda konformi Spiritu di Deus na gia bos. Asin bo ka na sigi disežu mau di bo naturesa. ¹⁷Kil ku no naturesa umanu misti i kontra kil ku Spiritu misti. Kil ku Spiritu tamba misti i kontra no naturesa. E dus e ta geria kontra n̄utru; asin bo ka ta pudi fasi kil ku bo misti, ¹⁸ma si Spiritu gia bos, bo ka sta bas di lei.

¹⁹I klaru kuma ku naturesa di omi ta fasi; i ta mostradu na pekadu seksual, vida susu, puku borgoña, ²⁰adora idulus, futis, inimisadi, jus, kumbosadia, raiba, geras, junda-junda, rapatimentu di partidus, ²¹nveža, bibidera, wukesa, ku utru kusas ku parsi suma es. N na avisa bos, suma ku N tarda avisaba ja, kuma kilis ku ta fasi asin ka na ten parti na renu di Deus.

²²Spiritu di Deus ta padi frutu di amor, alegria, pas, pasensa, pruntidon pa juda, bondadi, sedu algin di fianza, mansesa ku puder pa guberna kurpu. ²³I ka ten lei kontra e

kusas. ²⁴Kilis ku sedu di Kristu Jesus e krusifika se naturesa umanu, ku tudu disežu mau ku na yardi dentru di ki naturesa. ²⁵Si i Spiritu ku danu vida, no disal tamba pa i gianu na no kamiñu. ²⁶Ka no sedu garandiosu, pa ba ta provoka n̄utru, pa nveža n̄utru.

Juda n̄utru ku kargu

6 ¹Ña ermons, si un algin ciga di kai di repenti na un kulpa, abos ku na yanda diritu ku Deus bo dibi di ndirital ku mansesa. Bo jubi pa bo kabesa, pa ka bo bin sedu tentadu tamba. ²Bo juda n̄utru ku kargu; asin bo ta fasi kil ku lei di Kristu fala. ³Si algin kuda kuma el i algin, ma el i ka ningin, i na ngana si kabesa. ⁴Kada kin dibi di jubi pa kil ki fasi; si i bon, i pudi kontenti ku si kabesa, sin i jubi pa kusa ku utru fasi, ⁵pabia kada kin ten ku karga si propi kargu.

⁶Si algin na nsinadu palabra di Deus, i dibi di rapati tudu kusa bon ki tene ku si pursor.

⁷Ka bo ngana bo kabesa; ningin ka pudi fasi Deus diskarna. Kil ku omi sumia, i el ki na kebra tamba. ⁸Kil ku sumia na si naturesa umanu i na bin kebra mortu la, ma kil ku sumia na Spiritu, i na kebra vida ku ka ta kaba ku Spiritu padi pa el. ⁹Ka no kansa fasi ben. Ora ki ciga ora, no ta kebra si frutu, si no ka menusa forsa. ¹⁰Asin, nkuan-tu no ten manera, no fasi ben pa tudu jinti, ma purmeru pa no familia na fe.

5.16: Rom 6.12; 8.2-5 **5.17:** Rom 7.15,19,23

5.18: Rom 6.14 **5.19:** Mat 15.19; Ef 5.3; Kol 3.5-6

5.21: Apok 22.15 **5.22:** Jon 15.5; 1 Kor 13.4-8; Fil 4.8;

Kol 3.12; Tia 3.17-18 **5.24:** Kap 2.20; Kol 3.5

5.25: V 16 **5.26:** Fil 2.3 **6.1:** 2 Tes 3.15; 2 Tim 2.25;

Eb 12.13; Tia 5.19; 1 Jon 5.16 **6.2:** Jon 13.14-15,34;

Rom 15.1; 1 Tes 5.14 **6.3:** Rom 12.3; 1 Kor 8.2

6.4: 2 Kor 13.5 **6.5:** Rom 14.12 **6.6:** Rom 15.27

6.7: 1 Kor 6.10 **6.7:** Jo 4.8 **6.8:** Rom 8.13; Tia 3.18

6.9: Mat 24.13; 1 Kor 15.58; Eb 3.6,14 **6.10:** 1 Tes 5.15;

1 Tim 6.18 **6.10:** Ef 2.19

Avisu di kabantada ku manteña

¹¹Bo jubi e letra garandi; gosi i ami ku na skirbi bos ku ña mon propi. ¹²Jinti ku misti forsija bos pa bo sirkunsidadu, elis ku misti ronka pa njata ku kusas di fora. E ta fasil son pa e pudi kapli pirsigison pabia di krus di Kristu. ¹³Mesmu kilis ku ta sirkunsida jinti e ka ta obdisi tudu lei; e misti son pa bo sirkunsidadu pa e njata suma ku bo seta fasi ki sirmonia di kurpu. ¹⁴Pa Deus lunjusin di njata na utru kusa ku ka sedu krus di no Siñor Jesus

Kristu, kil ku, pabia del, mundu sta krusifikadu pa mi, ami pa mundu. ¹⁵I ka ten nin importansia si algin sirkunsidadu o nau; ma ke ki importanti i pa sedu nobu algin. ¹⁶Pa tudu kilis ku na yanda konformi e nsinamentu, pas ku misericordia ta sta riba delis, tambí riba di tudu Israel di Deus.

¹⁷Gosi pa dianti ka ningin dan mas kansera, pabia marka ku N tene na ña kurpu mostra kuma ami i katibu di Jesus.

¹⁸Ermons, fabur di no Siñor Jesus Kristu ta sta ku bo spiritu. Amen.

6.12: Fil 3.18 **6.14:** Rom 6.6; Fil 3.7-8

6.15: 1 Kor 7.19; 2 Kor 5.17; Kol 3.11

6.16: Rom 2.29 **6.17:** 2 Kor 4.10; Kol 1.24

6.18: Rom 16.20